
■ REGENZA

Ina cunvegna da fusiun è fitg lianta

(anr/gc) La votaziun da dumengia passada en la vischnanca fusiunada Lumnezia – davart la reducziun dal dumber da suprastants da nov sin tschintg e ch'il suveran ha acceptà cleramain – è era stada ier in tema tar l'inscunter tranter da la Rregenza ed ils represchentants da la medias. Enconuschentamain aveva la regenza preannunzià sias grondas resalvas vers ina tala midada costituziunala. Pertge? La cunvegna da fusiun – uschia ha cuss. *guv. Barbara Janom Steiner* constatà – saja sco in testament liant. Tras quel hajan las vischnancas pertutgadas renunzià a lur suveranità, daventond be pli vischinadis da la vischnanca fusiunada. En questa cunvegnientscha hajan ins perquai mess sapientivamain paisa sin il resguard da las minoritads – quai che tuttas vischnancas sajan daventadas. Ins vulevi cun nov suprastants che gea tuttas otg vischnancas sajan represchentadas en la suprastanza da la vischnanca fusiunada. Ina tala stipulaziun saja fundamentala ed era da considerar sco in instrument da proteger e resguardar tuts vischnadis. Ins stoppia era sa dumandar da princip sch'ina tala pretensiun fundamentala da la cunvegna da fusiun astgia in summa vegnir abolida suenter uschè curt temp.

La regenza ha prendì notizia dal resultat da la votaziun. Ella vegnia uss ad examinar da radent quella midada – e quai tant sut aspects politics sco giuridics ed alur decider. Senza il placet da la regenza na po questa midada numnadamain betg ir en vigor.

Nova speranza per l'areal a Domat

Ils votants e las votantas da Domat han decidì dumengia da midar l'areal nunduvrà da la resgia en ina zona d'industria. En curt vegnia la regenza ad approvar quella midada. Lezza ha già acquistà ils dretgs da construcziun da la firma Pfeiffer per 10,8 milliuns. Il chantun ha dentant fatg la cundiziun che be interpresas grischunas ch'exporteschian possian acquistar terren da construcziun sin quest areal. Ins quenta che la firma Hamilton a Panaduz entschaivia en curt cun la construcziun d'in nov edificì. La demontascha dals indrezs existents e la revitalisaziun da l'entir areal custian tranter 10 e 20 milliuns ch'il chantun haja da surpigliar.